



Broj: 02-50-1-16-25/09

Sarajevo: 26.2.2009. godine

ZAPISNIK

25. sjednice Doma naroda

Parlamentarne skupštine Bosne i Hercegovine, održane 26.2.2009.godine

Sjednica je počela u 11 sati.

Sjednicom je predsjedavao Mladen Ivanić, predsjedavajući Doma naroda Parlamentarne skupštine BiH.

Sjednici je prisustvovalo 14 delegata.

Delegat Božo Rajić opravdao je odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija i sredstava javnog informiranja.

Dušanka Majkić predložila je da se u dnevni red sjednice Doma naroda uvrsti nova tačka: Inicijativa za pokretanje istrage i utvrđivanje odgovornosti za nezakonit rad u institucijama BiH.

S pet glasava „za“, pet „protiv“ i četiri „suzdržana“ glasa, Dom naroda nije usvojio prijedlog Dušanke Majkić da se navedena inicijativa uvrsti u dnevni red 25. sjednice.

Nakon rasprave u kojoj su učestvovali: Dušanka Majkić, Alma Čolo, Drago Ljubičić, Sulejman Tihiić, Branko Zrno, Mladen Ivanić, Hilmo Neimarlija, Adem Ibrahimpašić i Slobodan Šaraba, Dom naroda usvojio je sljedeći

DNEVNI RED

1. Izjašnjavaње Doma naroda o podnošenju ostavke Mladena Ivanića na mjesto predsjedavajućeg Doma naroda Parlamentarne skupštine BiH;
2. Imenovanje predsjedavajućeg Doma naroda Parlamentarne skupštine BiH iz srpskog naroda;
3. Odgovori na delegatska pitanja i delegatska pitanja;
4. Usvajanje Zapisnika 24. sjednice Doma naroda;
5. Prijedlog zakona o zaštiti i dobrobiti životinja (drugo čitanje), predlagač: Vijeće ministara BiH;
6. Prijedlog zakona o genetički modificiranim organizmima (drugo čitanje), predlagač: Vijeće ministara BiH;
7. Prijedlog zakona o dopuni Zakona o Javnom radiotelevizijskom sistemu BiH (drugo čitanje) predlagač: Vijeće ministara BiH;
8. Prijedlog zakona o dopuni Zakona o carinskoj tarifi BiH (prvo čitanje), predlagač: Vijeće ministara BiH;
9. Prijedlog zakona o Agenciji za razvoj informacionog društva BiH (prvo čitanje), predlagač: Vijeće ministara BiH;
10. Prijedlog zakona o zrakoplovstvu BiH (prvo čitanje), predlagač: Vijeće ministara BiH;
11. Prijedlog zakona o Agenciji za pružanje usluga u zračnoj plovidbi (prvo čitanje), predlagač: Vijeće ministara BiH;

12. Izjašnjavaње o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika (prvo čitanje), predlagač: Vijeće ministara BiH;
13. Prijedlog zakona o besplatnoj pravnoj pomoći (prvo čitanje), predlagač Vijeće ministara BiH;
14. Prijedlog zakona o međunarodnoj pravnoj pomoći u krivičnim stvarima (prvo čitanje), predlagač: Vijeće ministara BiH;
15. Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera (prvo čitanje), predlagač: Vijeće ministara BiH;
16. Prijedlog zakona o izmjenama i dopunama Zakona o ministarstvima i drugim organima uprave BiH (prvo čitanje), predlagač: Vijeće ministara BiH;
17. Prijedlog zakona o izmjenama i dopunama Zakona o državnoj službi u institucijama BiH (prvo čitanje), predlagač: Vijeće ministara BiH;
18. Prijedlog zakona o izmjenama i dopunama Zakona o Agenciji za rad i zapošljavanje BiH (prvo čitanje), predlagač: Vijeće ministara BiH;
19. Prijedlog zakona o izmjenama i dopunama Zakona o policijskim službenicima BiH (prvo čitanje), predlagač: Vijeće ministara BiH;
20. Odluka Predsjedništva BiH o postavljenju profesionalnih vojnih lica na formacijska mjesta u Oružanim snagama BiH;
21. Odluka Predsjedništva BiH o učešću pripadnika Oružanih snaga BiH u misiji Snaga međunarodne sigurnosne pomoći (ISAF) u Islamskoj Republici Afganistan;
22. Odluka Zajedničke komisije za administrativne poslove o izmjenama Pravilnika o međunarodnim aktivnostima Parlamentarne skupštine BiH – radi potvrđivanja;
23. Izvještaj o radu Interresorne radne grupe za izradu Prijedloga zakona o imunitetu;
24. Izvještaj o aktivnostima na projektu „Autoput na Koridoru Vc“ i Plan narednih aktivnosti;
25. Imenovanje predsjedavajućeg, zamjenika i članova Nezavisnog odbora i Odbora za žalbe građana, kao nezavisnih tijela policijske strukture BiH (Prijedlog Ad hoc zajedničke komisije za provođenje procedure imenovanja Nezavisnog odbora i Odbora za žalbe građana)
26. Davanje saglasnosti za ratifikaciju izmjena Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji;
27. Davanje saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc;
28. Davanje saglasnosti za ratifikaciju Sporazuma između Bosne i Hercegovine i Švicarske o olakšicama prilikom izdavanja viza;
29. Davanje saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole;
30. Davanje saglasnosti za ratifikaciju Okvirne konvencije Svjetske zdravstvene organizacije o kontroli duhana;
31. Davanje saglasnosti za ratifikaciju Memorandumu o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanja, tehnološki razvoj i ogledne aktivnosti;
32. Davanje saglasnosti za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH;
33. Davanje saglasnosti za ratifikaciju Sporazuma između Vijeća ministara BiH i Vlade Crne Gore o saradnji u oblasti kulture;
34. Davanje saglasnosti za ratifikaciju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit.

Ad.1. Izjašnjavanje Doma naroda o podnošenju ostavke Mladena Ivanića na mjesto predsjedavajućeg Doma naroda Parlamentarne skupštine BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Sulejman Tihić i Ilija Filipović.

Dom naroda je, sa 13 glasova „za“ i jednim „suzdržanim“ glasom, usvojio ostavku dr. Mladena Ivanića na mjesto predsjedavajućeg Doma naroda Parlamentarne skupštine BiH.

Ad.2. Imenovanje predsjedavajućeg Doma naroda Parlamentarne skupštine BiH iz srpskog naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda je, sa 13 glasova „za“ i jednim „suzdržanim“ glasom, na mjesto predsjedavajućeg Doma naroda Parlamentarne skupštine BiH imenovao Dušanku Majkić, nakon čega je imenovana preuzela predsjedavanje sjednicom.

Ad. 3. Odgovori na delegatska pitanja i delegatska pitanja

Odgovore na delegatska pitanja dobili su: Alma Čolo, na pitanje postavljeno na 23. sjednici, Hilmo Neimarlija, na pitanje postavljeno na 24. sjednici, i Rudo Vidović, na pitanje postavljeno na 24. sjednici.

Delegat Hilmo Neimarlija izjasnio se da je dobiveni odgovor primio k znanju ali da očekuje odgovor ostalih nadležnih institucija.

Delegat Alma Čolo izjasnila se da je zadovoljna dobivenim odgovorom ali ne i riješenjima koji postoje u BiH u vezi s naknadama za vrijeme porodiljskog odsustva i poreza na plaću

Rudo Vidović izjasnio se da je zadovoljan dobivenim odgovorom ali ne i stanjem korištenja frekventnog spektra u BiH.

Delegat Alma Čolo postavila je sljedeće pitanje Vijeću ministara BiH:

„Da li je moguće da se propisom na nivou BiH (Zakonom o plaćama i naknadama u institucijama BiH ili nekim drugim propisom) ujednače prava svih zaposlenih žena u institucijama BiH. Pod ovim se misli na jednako pravo na naknade po osnovu porodiljskog odsustva, jednako reguliranje poreza i doprinosa na plaće i sl.“

Delegat Slobodan Šaraba postavio je sljedeće pitanje Vijeću ministara BiH:

Kada će se u parlamentarnoj proceduri pojaviti Zakon o denacionalizaciji, s obzirom na izuzetan značaj ovog zakonskog propisa za građane BiH.

Delegat Mladen Ivanić postavio je i sljedeće pitanje Upravi za indirektno oporezivanje BiH:

„Da li je Uprava za indirektno oporezivanje BiH pripremila analizu efekata uvođenja niže stope PDV-a, s obzirom da je to bio jedan od zaključaka Komisije kada je odbijen Prijedlog o uvođenju niže stope koju su podnijeli delegat Mladen Ivanić i poslanik Branko Dokić, članovi PDP-a.“

Delegat Zoran Koprivica postavio je sljedeća pitanja Kolegiju oba doma Parlamentarne skupštine BiH:

Predlažem Kolegiju oba doma da u najskorije vrijeme razmotri ovu inicijativu te donese odluku o nabavci jednog putničkog vozila - minibusa, koji će imati do 15 mjesta.

Vozilo bi služilo za potrebe parlamentarnih komisija i službi prilikom posjeta okolnim i bližim evropskim državama. Imajući u vidu cijene avioprijevoza, smatram da bi se jedna ovakva investicija isplatila za godinu dana.

Zato pokrećem inicijativu, te predlažem Zajedničkom kolegiju da nakon sačinjene analize potreba Parlamentarne skupštine BiH, te ogromnih troškova avioprijevoza, donese predloženu odluku.

Delegat Ivo Miro Jović je, u ime Kluba hrvatskog naroda, postavio sljedeće pitanje Visokom sudskom i tužilačkom vijeću BiH, Tužilaštvu BiH i Sudu BiH.

1. Sud BiH izrekao je, 19.2.2009., nepravomoćnu presudu četvorici Hrvata za navodne zločine nad muslimanima u zatvoru Vojno kod Mostara, u trajanju od 80 godina. Nisu optuženi za ubistvo, jer se ubistvo nije ni desilo. Istoga dana isti sud oslobodio je četiri Bošnjaka iz Bugojna, koji su optuženi za zločin nad Hrvatima u zloglasnom logoru Stadion. Hrvati su bili zatočeni na otvorenom od 11.7.1993. do 19.3.1994. I pored toga što su bili registrirani kod Međunarodnog crvenog krsta, svi oni koji su bili visokoobrazovani ili su ubijeni ili se vode kao nestali. Još se traži 21 zatočenik ovog logora. Logor Stadion je samo jedan od 20 logora na području Bugojna.
Kako je to moguće? Radi li ovaj sud po principima pravednosti?
2. Kako je moguće da su osuđeni za ratne zločine nad Hrvatima civilima u Grabovici, Nihad Vlahovljak, Haris Rajkić i Sead Karagić, svi osuđeni na 13 godina zatvora presudom Kantonalnog suda u Mostaru i potvrđenom kaznom na Sudu BiH 18.9.2008., još uvijek budu na slobodi?

Delegat Adem Ibrahimpašić postavio je sljedeće pitanje Vijeću ministara BiH:

„Bosna i Hercegovina je jedina zemlja u Evropi koja nema pravilnik o prirodnim izvorskim i mineralnim vodama. Dakle, imamo potpuno neregulirano stanje u ovoj oblasti na bh. tržištu, što naravno koriste proizvođači ovih proizvoda iz okruženja. Istovremeno su ti proizvođači izlobirali da u njihove istovjetne pravilnike budu ugrađene odredbe koje praktično onemogućavaju izvoz izvorske i mineralne vode iz Bosne i Hercegovine u npr. Republiku Hrvatsku.

Pitanje glasi:

- Zašto mi u BiH još uvijek nemamo pomenuti pravilnik, odnosno kada ćemo dobiti pravilnik o prirodnim izvorskim i mineralnim vodama? Napominjem da u njemu moraju postojati odredbe recipročne odredbama iz istovjetnih pravilnika iz zemalja u okruženju.“

Delegat Dušanka Majkić postavila je i sljedeća pitanja:

Agenciji za istragu i zaštitu:

Zbog nelegalnog podnošenja izvještaja o krivičnom djelu protiv premijera Milorada Dodika i 14 lica iz Republike Srpske, molim da mi dostavite potpunu informaciju o sljedećem:

1. Da li je u SIPA-i pokrenuta istraga i utvrđivanje odgovornosti lica koja su učestvovala u nelegalnom podnošenju izvještaja protiv premijera Republike Srpske i drugih, te da li su i koje mjere predložene za prevazilaženje stanja u toj instituciji?
2. O kojim imenima i nacionalnoj strukturi lica koja su uzimala izjave, odnosno zabilješke u predmetnom slučaju se radi (na osnovu službenih zabilješki i uzetih izjava u konkretnom predmetu)?

3. Da li je direktor SIPA-e bio upoznat s prethodno provedenom istragom u SIPA-i, posebno s načinom predaje izvještaja tužiocu, protiv predsjednika Vlade Republike Srpske i ostalih?
4. Ako nije bio upoznat, ko je odobrio tajnu istragu u SIPA-i?
5. Šta je direktor SIPA-e preduzeo prema odgovornim licima u SIPA-i.

Visokom sudskom i tužilačkom vijeću BiH:

Zbog nelegalnog podnošenja izvještaja o krivičnom djelu protiv premijera Milorada Dodika i 14 lica iz Republike Srpske, a s ciljem sagledavanja kompletne problematike rada stranih tužilaca i sudija u pravosuđu BiH, molim da me u najkraćem roku obavijestite o sljedećem:

1. Da li je Visoko sudsko i tužilačko vijeće BiH provjerilo i ispitalo referentnost stranih tužilaca i sudija u Tužilaštvu i Sudu BiH, te da li je izvršena provjera njihovog rada u pravosuđu zemalja iz kojih dolaze? Kakvi su ti nalazi?
2. Da li je ispitana odgovornost tužilaca Drju Engela i Harija Furlana u djelu protiv premijera Milorada Dodika i ostalih i kakvi su ti nalazi?
3. Da li je Visoko sudsko i tužilačko vijeće ikada zatražilo i dobilo informaciju od Tužilaštva Republike Slovenije o pogodnosti tužioca Harija Furlana za obavljanje dužnosti tužioca u Tužilaštvu BiH. Ako nije, kada se to planira učiniti?

Tužilaštvu BiH:

Zbog nelegalnog podnošenja izvještaja o krivičnom djelu protiv premijera Milorada Dodika i 14 lica iz Republike Srpske, molim da mi dostavite potpunu informaciju o sljedećem:

1. Da li je glavni tužilac bio upoznat s prethodno provedenom istragom, posebno s načinom prijema izvještaja protiv predsjednika Vlade Republike Srpske i ostalih, te kada je i kako saznao za izvještaj koji je predat Tužilaštvu BiH?
2. Ako nije bio upoznat, ko je odobrio tajnu istragu u Tužilaštvu BiH?
3. Šta je glavni tužilac preduzeo prema odgovornim licima u Tužilaštvu BiH?
4. Da li je ispitana odgovornost tužilaca Drju Engela i Harija Furlana u konkretnom slučaju i kakvi su ti nalazi?

Ad. 4. Usvajanje Zapisnika 24. sjednice Doma naroda

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio Zapisnik 24. sjednice Doma naroda.

Ad. 5. Prijedlog zakona o zaštiti i dobrobiti životinja (drugo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali su: Hazim Rančić, Drago Ljubičić, Dušanka Majkić, Branko Zrno, Adem Ibrahimpašić, Zoran Koprivica, Ivo Miro Jović i Alma Čolo.

Dom naroda jednoglasno je usvojio Prijedlog zakona o zaštiti i dobrobiti životinja u drugom čitanju sa sljedećim amandmanima :

Amandman I.

U članu 2. u tački d) umjesto riječi: "napuštenih i izgubljenih" upisuju se riječi: "napuštenih, izgubljenih i uginulih".

Amandman II.

U članu 3. iza tačke dodaje se nova rečenica koja glasi: "Zabranjeno je životinju mučiti i namjerno izlagati stresu i strahu".

Amandman III.

U članu 4. Prijedloga zakona unose se sljedeće izmjene:

- na kraju tačke f) umjesto interpunkcijskog znaka tačka-zarez upisuje se zarez i dodaje tekst: „uključujući borbe pasa, bikova, medvjeda, pijetlova, kao i svih ostalih životinja“;
- u tački i) iza riječi „životinje“ upisuje se interpunkcijski znak tačka-zarez i briše se ostatak teksta;
- u tački j) iza riječi "lovu" dodaju se riječi: "i ribolovu";
- iza tačke v) dodaju se nove tačke: z), ž), aa), bb), cc), dd), ee), ff), gg), hh) i ii) koje glase:
 - “z) upotrebljavati nedozvoljene zamke za hvatanje životinja;
 - ž) uzgajati životinje s ciljem proizvodnje krzna;
 - aa) držati životinje u cirkusima te ih koristiti u cirkuskim predstavama s drugim životinjama;
 - bb) organizirati utrke pasa na tvrdim podlogama;
 - cc) koristiti tehničke uređaje, pomagala ili naprave kojima se u obliku kazne utiče na ponašanje životinja, uključujući bodljikave ogrlice ili sredstva koja uključuju upotrebu električne energije ili hemijskih supstanci;
 - dd) uzgajati životinje na način da trpe bol, patnju i strah te ih namjerno povređivati, protivno pravilima struke, odnosno najnovijim naučnim dostignućima, te uvoziti i prodavati životinje koje potiču iz takvog uzgoja;
 - ee) povećavati agresivnost životinja selekcijom ili drugim metodama;
 - ff) davati žive životinje kao nagrade u igrama na sreću;
 - gg) prisiljavati životinje na ponašanje koje kod njih izaziva bol, patnju, povrede ili strah;
 - hh) izlagati životinje nepovoljnim temperaturama i vremenskim uslovima, protivno prihvaćenim zoohigijenskim standardima za pojedinu vrstu ili nedostatku kisika, čime se kod životinja uzrokuje bol, patnja, povrede ili strah;
 - ii) zanemarivati životinje s obzirom na njihovo zdravlje, smještaj, ishranu i njegu.”

Amandman IV.

U članu 5. iza tačke e) dodaju se nove tačke f) i g) koje glase:

- “f) ne izlagati životinju ekstremnoj toploti ili hladnoći;
- g) osigurati životinji dovoljno kretanja”.

Amandman V.

U članu 6. stav (3) mijenja se i glasi:

“(3) Zabranjeno je držati kao kućne ljubimce životinje koje su zaštićene, divlje životinje, te životinjske vrste i pasmine koje su opasne za život”.

Dodaje se novi stav (4), koji glasi:

“(4) Imaoci kućnih ljubimaca moraju osigurati kontrolu razmnožavanja životinja pod njihovim nadzorom.”

Amandman VI.

Iza člana 6. dodaje se novi član 6., koji glasi:

“Član 6a.

Uzgoj kućnih životinja namijenjenih prodaji ne može početi bez rješenja o zadovoljavanju uslova koje donosi nadležno ministarstvo, na prijedlog Ureda.”

Amandman VII.

U članu 7. dodaje se stav (3), koji glasi:

“(3) Ured će voditi registar svih označenih pasa i mačaka”.

Amandman VIII.

Član 8. Prijedloga zakona mijenja se i glasi:

- (1) Kućni ljubimci ne smiju se prodavati licima mlađim od 18 godina, osim ako imaju dozvolu (ako su u pratnji) roditelja ili staratelja.
- (2) Zabranjena je prodaja egzotičnih životinja i životinja koje su zakonom zaštićene.
- (3) Zabranjena je prodaja kućnih ljubimaca na tržnicama i sajmovima.
- (4) Prodaja kućnih ljubimaca dozvoljena je samo u trgovinama za prodaju kućnih ljubimaca koje ispunjavaju posebne uslove i imaju izdato rješenje nadloženog organa:
 - a) da je za svaku životinju osiguran dokaz o njenom porijeklu i zdravstvenom stanju;
 - b) da su zaposleni u trgovinama osposobljeni za brigu o životinjama i za izdavanje pisanog uputstva o odgovarajućem načinu držanja životinja koje prodaju.
- (5) Zabranjeno je prodavati pse i mačke u trgovinama za prodaju kućnih ljubimaca.
- (6) Nadležni organ propisuje posebne uslove iz stava (4) ovog člana, te uslove za osposobljenost osoblja i način propisivanja uputa iz stava (4)b).

Amandman IX.

U članu 10. u stavu (4) tačke i) i k) brišu se.

Amandman X.

Iza člana 15. dodaje se novi član 15a., koji glasi:

“Član 15a.

- (1) U klaonici se sa životinjama mora postupati na sljedeći način:
 - a) životinje za klanje potrebno je po prispieću istovariti iz prijevoznog sredstva uz upotrebu odgovarajuće opreme, kako bi životinje pošteđeli uznemirenosti, straha, patnji i bolova;
 - b) životinju treba pažljivo voditi u krugu klaonice do prostora za smještaj i bez nanošenja bola, uz primjenu odgovarajućeg pribora za vođenje;
 - c) klaonice moraju biti opremljene odgovarajućim oborima ili stajama u koje životinje treba da budu smještene, zaštićene od nepovoljnih klimatskih uslova, hranjene i napajane do klanja;
 - d) životinje moraju biti omamljene odgovarajućim postupcima neposredno prije klanja, kojima se moraju dovesti u stanje neosjetljivosti i u tom stanju usmrtniti.
- (2) Klanje se mora obaviti upotrebom odgovarajuće opreme.
- (3) Bolesne i povrijeđene životinje potrebno je klati na samom kraju, poslije klanja zdravih životinja, bez dodatnog izazivanja bola i mučenja.
- (4) Nadležno ministarstvo, na prijedlog Ureda, pobliže propisuje uslove za zaštitu životinja prilikom klanja.
- (5) Životinja se ne smije zaklati ako nije obavljen veterinarski pregled prije klanja i ako nije omamljena na propisan i stručan način.”

Amandman XI.

Iza člana 16. dodaje se novi član 16a., koji glasi:

“Član 16a.

- “(1) Zabranjeno je prevoziti životinje ako bi se prijevozom izazvale patnja, bol, mučenje, oboljenja, uginuća životinja, kao:
- a) utovar i prijevoz tokom velike vrućine ili hladnoće;

- b) prijevoz u nepokrivenim kamionima, vagonima, dijelu plovila, pri čemu životinje nisu zaštićene od klimatskih uslova;
 - c) prijevoz u zatvorenim prijevoznim sredstvima, kavezima i spremnicima ako u njima nije osigurano prozračivanje;
 - d) prijevoz životinja osjetljivih na niske ili visoke temperature ako tokom prijevoza nije osigurana odgovarajuća temperatura;
 - e) prijevoz bez osiguranja od samopovređivanja životinje, povređivanja drugih životinja ili ispadanja iz prijevoznog sredstva;
 - f) prijevoz bez osiguranog hranjenja, napajanja i odmora životinja u propisanim intervalima;
 - g) prijevoz bolesnih životinja ili u slučaju postojanja sumnje da su bolesne ako nije osigurana veterinarska pomoć;
 - h) prijevoz životinja za koje postoji sumnja da boluju od zaraznih bolesti;
 - i) prijevoz vodenih životinja u posebnim prijevoznim sredstvima ili spremnicima bez dovoljne količine vode, odgovarajuće temperature i kisika;
 - j) prijevoz ženki u posljednjoj četvrtini bremenitosti, ženki u prvih 48 sati nakon okota i njihove mladunčadi, osim ako je potrebna hitna veterinarska intervencija;
 - k) zabranjeno je prevoziti materijale u istom prijevoznom sredstvu koji bi mogli biti opasni za njihovo zdravlje i život.
- (2) Obavljanje prijevoza na neki od načina iz stava (1) ovog člana smatra se mučenjem životinja.
- (3) Prijevoznik je dužan osigurati zaštitu od opasnih i divljih životinja, te njihovu fizičku zaštitu, a prijevozno sredstvo mora biti označeno tako da upozorava na prijevoz opasnih ili divljih životinja.
- (4) Prijevoznik je dužan odrediti lice koje će se tokom prijevoza brinuti o ispunjavanju propisanih uslova za transport životinja, njihovom napajanju, hranjenju i odmoru, a koje mora biti stručno osposobljeno, čiji program obuke i osposobljavanja propisuje nadležno ministarstvo.
- (5) Pri utovaru, istovaru, pretovaru i tjeranju zabranjena je upotreba predmeta kojima se životinji direktno nanosi bol.”

Amandman XII.

U članu 21. u naslovu brišu se riječi: “i cirkusa”, kao i u tekstu riječ “cirkusima”.

Amandman XIII.

U članu 22. u naslovu brišu se riječi: “i cirkus”.

U stavu (3) istoga člana brišu se riječi: “cirkuske priredbe sa životinjama”.

U stavu (4) brišu se riječi: “cirkuskih priredbi sa životinjama i”.

Amandman XIV.

U članu 25. u stavu (1) na kraju tačke c) dodaju se riječi: “i omogućiti joj dovoljno kretanja”.

U istom stavu dodaju se nove tačke: f), g), h) i i) koje glase:

“f) obaviti obaveznu sterilizaciju i kastraciju svih pristiglih napuštenih i izgubljenih životinja nakon isteka roka iz stava (2) ovog člana;

g) primati prijave o napuštenim i izgubljenim životinjama;

h) angažirati se na udomljavanju životinja i prolanaženju vlasnika;

i) mikročipovati svaku pristiglu životinju ako ona već nije mikročipovana.”

U istome članu iza stava (3) dodaje se novi stav (4), koji glasi:

“(4) Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet.”

Sadašnji stav (4) postaje stav (5), a na kraju ovog stava dodaju se riječi: “te vodi upisnik skloništa za životinje”.

Amandman XV.

U članu 28. iza stava (6) dodaje se novi stav (7), koji glasi:

“(7) Imaoci životinja za eksperiment dužni su:

- a) životinjama za eksperimente pružiti smještaj, hranu, vodu, brigu odgovarajuću njihovom zdravlju i dobrobiti;
- b) svesti na minimum ograničenja s ciljem zadovoljenja njihovih psihičkih i etioloških potreba;
- c) nadgledati okruženje u kojem se nalaze;
- d) svakodnevno provjeravaju njihovu dobrobit i zdravstveno stanje;
- e) otkloniti uzroke nezgoda, trpljenja, bola na najbrži mogući način;
- f) obilježiti životinje i voditi evidenciju.”

Sadašnji stav (7) postaje stav (8).

Amandman XVI.

U članu 37. u tački f) riječ “cirkusima” briše se.

U istom članu dodaju se nove tačke l) i m) koje glase:

“l) odluku o uslovima koje moraju ispunjavati uzgajivači kućnih životinja namijenjenih prodaji;

m) odluku o uslovima za prodaju kućnih ljubimaca u trgovinama za prodaju kućnih ljubimaca, te uslove za osposobljenost osoblja.”

Amandman XVII.

U članu 38. tačka d) mijenja se i glasi:

“d) drži kao kućne ljubimce životinje navedene u članu 6. stav (3) ovog zakona”.

U istom članu dodaje se nova tačka n), koja glasi:

“n) obavlja radnje u suprotnosti s članom 6a.”

Amandman XVIII.

U članu 39. u tački h) iza broja “16” dodaju se riječi i broj: “i 16a.”

U istom članu u tački i) iza broja “15” dodaju se riječi i broj: “i 15a.”

U istom članu dodaje se nova tačka s), koja glasi:

“s) obavlja radnje u suprotnosti s članom 16a.”

Amandman XIX.

U članu 40. dodaju se novi stavovi (2), (3), (4) i (5) koji glase:

“(2) Imaoci pasa i mačaka dužni su u roku od šest mjeseci od dana stupanja na snagu ovog zakona mikročipovati i upisati u registar svoje kućne životinje rođene, odnosno nad kojima je stečeno vlasništvo prije stupanja na snagu ovog zakona.

(3) Skloništa za životinje iz člana 25. moraju biti osnovana u roku od godine dana od stupanja na snagu ovog zakona.

(4) Dok tijela predviđena ovim zakonom ne osnuju skloništa za životinje iz člana 25. ovog zakona, veterinarske stanice mogu, u saradnji s nadležnim općinskim tijelima, obavljati kastraciju, sterilizaciju i obilježavanje napuštenih životinja, naročito pasa lotalica, te ih ponovo puštati na mjesta prirodnog staništa, a s ciljem stabilizacije populacije napuštenih životinja kontrolom njihove reprodukcije u kratkom roku.

(5) Odredba člana 4. ovog zakona o zabrani uzgoja životinja u svrhu proizvodnje krzna stupit će na snagu 2018. godine.”

Usvojeni amandmani identični su amandmanima usvojenim u Predstavničkom domu.

Dom naroda je, sa devet glasova „za“ i četiri glasa „protiv“, usvojio sljedeći zaključak:

„Zadužuju se Vijeće ministara BiH, resorno ministarstvo i nadležni Ured za veterinarstvo da u podzakonskim aktima Zakona o zaštiti i dobrobiti životinja dozvole organiziranje tradicionalnog takmičenja bikova na tradicionalnim manifestacijama.

Zadužuje se Vijeće ministara BiH da sagleda aspekt tradicionalnog takmičenja i tradicionalnih manifestacija te pokrene izmjene Zakona o zaštiti i dobrobiti životinja“.

Ad.6. Prijedlog zakona o genetički modificiranim organizmima (drugo čitanje), predlađač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio Zakon o genetički modificiranim organizmima u drugom čitanju sa sljedećim amandmanima:

Amandman I.

U članu 1. u stavu (2) riječi: «genetički modificiranu hranu i hranu za životinje» zamjenjuju se riječima: «genetički modificirane organizme i proizvode od genetički modificiranih organizama, kao i žive modificirane organizme».

Amandman II.

U članu 2. u tački 25) iza riječi: „u poslovanju“ dodaju se riječi: „, s GMO-om“.

Amandman III.

Član 3. mijenja se i glasi:

„Član 3.

(Nadležna tijela)

(1) U smislu ovog zakona, nadležna tijela su: Agencija za sigurnost hrane Bosne i Hercegovine (u daljnjem tekstu: Agencija), Ured za veterinarstvo Bosne i Hercegovine, Uprava Bosne i Hercegovine za zaštitu zdravlja bilja, tijela entiteta, kantona i Brčko Distrikta BiH nadležna za oblast poljoprivrede, šumarstva i vodoprivrede, oblast zdravstva i zaštite okoliša.

(2) Za provođenje ovog zakona, u slučaju kada se GMO i/ili proizvodi koji sadrže i/ili se sastoje i/ili potiču od GMO-a:

a) ograničeno upotrebljavaju u kontroliranom zatvorenom sistemu - nadležna su entitetska ministarstva nadležna za pitanja nauke uz saglasnost tijela entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede i mišljenja ostalih nadležnih tijela;

b) namjerno unose u okoliš - nadležna su entitetska ministarstva za pitanja poljoprivrede, vodoprivrede i šumarstva, uz prethodno pribavljeno mišljenje ministarstva zdravstva i ministarstava nadležnih za zaštitu okoliša ;

c) stavljaju na tržište;

1) kao hrana ili hrana za životinje - nadležna je Agencija uz prethodno pribavljeno mišljenje nadležnih tijela;

2) kao reprodukcioni materijal u poljoprivredi i šumarstvu ili kao sredstva za zaštitu bilja - nadležna je Uprava Bosne i Hercegovine za zaštitu zdravlja bilja uz saglasnost tijela entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede;

3) kao lijekovi ili reprodukcioni materijal u veterinarstvu - nadležan je Ured za veterinarstvo BiH uz prethodno pribavljeno mišljenje nadležnih tijela;

4) pri upotrebi GMO-a i/ili proizvoda koji sadrže i/ili se sastoje i/ili potiču od GMO-a u kozmetici, farmaciji ili zdravstvenoj zaštiti ljudi - nadležna su entitetska ministarstva zdravstva i Brčko Distrikta BiH uz prethodno pribavljeno mišljenje nadležnih tijela;

5) za inspekcijski nadzor označavanja u prometu GMO-a i/ili proizvoda koji sadrže i/ili se sastoje i/ili potiču od GMO-a - nadležne su entitetske uprave za inspekcijske poslove, kantonalne inspekcije, inspekcije unutar lokalnih tijela uprave i Inspektorat Vlade Brčko Distrikta BiH.

(3) Nadležna tijela iz st. (1) i (2) ovog člana provodit će službene kontrole, inspekcijski i upravni nadzor u skladu s važećim zakonskim propisima u Bosni i Hercegovini, entitetima i Brčko Distriktu BiH. Nadležna tijela dužna su međusobno sarađivati. Naučno-stručno tijelo osnovano u skladu s

ovim zakonom dužno je nadležnim organima uprave iz st. (1) i (2) ovog člana pružiti stručnu pomoć u provođenju ovog zakona.

(4) Agencija je centralno i koordinaciono tijelo za obavljanje stručnih poslova u vezi s GMO-om.”

Amandman IV.

U članu 4. u stavu (1) riječ „ovoga“ zamjenjuje se riječju „tog“.

Amandman V.

Član 5. mijenja se i glasi:

„Član 5.

(Izuzeci od primjene)

(1) Odredbe ovog zakona ne primjenjuju se na:

a) genetičke modifikacije koje se dobivaju primjenom jedne od sljedećih metoda (pod uslovom da ne obuhvataju korištenje rekombinantnih molekula nukleinske kiseline ili GMO-a različitih od onih proizvedenih jednom ili više tehnika/metoda navedenih u nastavu):

1) mutageneza,

2) fuziju stanica (uključujući i fuziju protoplasta) biljnih stanica organizama koji mogu razmjenjivati genetički materijal tradicionalnim uzgojnim metodama;

b) ograničenu upotrebu GMO-a koji nisu štetni za zdravlje ljudi i okoliš prema kriterijima određenim posebnim propisom;

c) kopneni, željeznički, zračni, pomorski i riječni prijevoz GMO-a;

d) postupanja sa živim modificiranim organizmima koji su opasni po okoliš na koja se primjenjuju odredbe posebnih propisa kojima se uređuju prijevoz, tranzit i postupanje s opasnim tvarima, ako ovim zakonom ili na osnovu njega donesenim propisom nije drugačije određeno;

e) samokloniranje koje se sastoji od uklanjanja sekvenci nukleinske kiseline iz stanice organizma koje može ali i ne mora biti praćeno ponovnim umetanjem cijele ili sekvence te nukleinske kiseline (ili sintetičnog ekvivalenta), s ili bez prethode enzimske ili mehaničke faze, u stanice iste vrste ili u stanice filogenetički blisko srodnih vrsta, koje mogu izmjenjivati genetički materijal prirodnim fiziološkim procesima, gdje nema vjerovatnoće da će dobiveni mikroorganizam izazvati bolest kod ljudi, životinja ili biljaka.

Samokloniranje može uključivati upotrebu rekombinantnih vektora s već poznatom praksom sigurne upotrebe u određenom mikroorganizmu.”

Amandman VI.

U članu 17. u stavu (2) tačka d) glasi:

„d) „sadržaj mišljenja Vijeća za GMO.“

U stavu (2) tačka e) briše se.

Amandman VII.

U članu 22. stav (3) u tački c) na kraju teksta dodaje se riječ: „korisnika.“

Iza tačke c) ostale tačke postaju tačke d), e), f) i g).

Amandman VIII.

U članu 23. stav (1) u tački b) riječ: „Odbora“ zamjenjuje se riječima: „Vijeća za GMO“.

U stavu (2) riječi: „Odbor za ograničenu upotrebu GMO-a dužan je“ zamjenjuju se riječima: „Vijeće za GMO dužno je“.

Amandman IX.

U članu 27. u stavu (2) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

U stavu (3) riječi: „Odbor za ograničenu uporabu GMO-a dužan je“ zamjenjuju se riječima: „Vijeće za GMO dužno je“.

U stavu (4) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

Amandman X.

U članu 28. u stavu (2) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

U stavu (4) riječi: „Odbor za ograničenu upotrebu GMO-a dužan je“ zamjenjuju se riječima: „Vijeće za GMO dužno je“.

Amandman XI.

U članu 38. u stavu (1) riječi: „Odbora za unošenje GMO-a u okoliš“ zamjenjuju se riječima: „Vijeća za GMO“.

U stavu (3) riječi: „Odboru za unošenje GMO-a u okoliš“ zamjenjuju se riječima: „Vijeću za GMO“.

U stavu (4) riječi: „Odbor za unošenje GMO-a u okoliš“ zamjenjuju se riječima: „Vijeće za GMO“.

U stavu (5) riječi: „Odbor za unošenje GMO-a u okoliš dužan je“ zamjenjuju se riječima: „Vijeće za GMO dužno je“.

Amandman XII.

U članu 40. u stavu (3) riječ: „dijela“ zamjenjuje se riječju: „poglavlja“.

Amandman XIII.

U članu 44. u stavu (1) iza riječi „pribavljenog“ dodaje se riječ „pozitivnog“, riječi: „Odbora za unošenje GMO-a u okoliš“ zamjenjuju se riječima: „Vijeća za GMO“, a na kraju teksta dodaju se riječi:

„GMO-a ili proizvoda od GMO-a“.

Amandman XIV.

U članu 45. stav (4) postaje stav (3).

Amandman XV.

U članu 46. u stavu (1) riječi: „Odbora za unošenje GMO-a u okoliš“ zamjenjuju se riječima: „Vijeća za GMO“.

U članu 46. u stavu (2) riječi: „Odbor za unošenje GMO-a u okoliš dužan je“ zamjenjuju se riječima: „Vijeće za GMO dužno je“.

Amandman XVI

U članu 47. u stavu (1) tačka b) mijenja se i glasi:

«b) pribavljanja pozitivnog mišljenja Vijeća za GMO;»

Amandman XVII.

U članu 50. u stavu (5) riječi: „nadležnog odbora“ zamjenjuju se riječima: „Vijeća za GMO“.

Amandman XVIII.

U članu 51. u stavu (4) riječi: „će se upotrebljavati“ zamjenjaju se riječima: „upotrebljavaju se“. Iza stava (4) ostali stavovi postaju stavovi (5) i (6).

Amandman XIX.

U članu 53. u stavu (4) riječi: „provodit će“ zamjenjaju se riječju „provode“.

Amandman XX.

U članu 54. stavak (1) u toč. b) i c) riječ „te“ briše se.

U stavu (2) riječi: „propisat će“ zamjenjuju se riječju „propisuje“.

Amandman XXI.

Naziv Poglavlja VII. zamjenjuje se i glasi: „NAUČNO-STRUČNO TIJELO ZA PROVOĐENJE ZAKONA“.

Član 55. mijenja se i glasi:

„Član 55.

(Vijeće za GMO)

(1) Radi praćenja stanja i razvoja u oblasti postupanja s GMO-om i pružanja stručne pomoći nadležnim tijelima u provođenju ovog zakona, Vijeće ministara BiH, na prijedlog Agencije, s kandidatske liste iz naučnih, stručnih i obrazovnih institucija iz entiteta i Brčko Distrikta BiH odlukom bira Vijeće za GMO na mandat od četiri godine, s tim što mogu biti imenovani na još jedan mandat.

(2) Vijeće za GMO ima sedam članova, koji se biraju isključivo između eminentnih naučnika i stručnjaka iz oblasti mikrobiologije, genetike, medicine, veterinarske medicine, biokemije, molekularne biologije, farmacije, biotehnologije, poljoprivrede, šumarstva, prava, zaštite na radu, zaštite prirode i zaštite okoliša, vodeći računa o ravnopravnoj zastupljenosti svih naroda i odgovarajućoj zastupljenosti entiteta i Brčko Distrikta BiH.

(3) Vijeće za GMO između svojih članova bira predsjednika i njegovog zamjenika. Vijeće za GMO je samostalno i neovisno tijelo i njegov je rad javan. Vijeće za GMO odlučuje većinom glasova, koja uključuje najmanje po jednog predstavnika svakog entiteta i svakog konstitutivnog naroda.

(4) Vijeće za GMO donosi poslovnik kojim uređuje način rada.

(5) Sredstva za rad Vijeća za GMO i obavljanje stručno-administrativnih poslova osiguravaju se u budžetu institucija Bosne i Hercegovine.“

Amandman XXII.

Član 56. mijenja se i glasi:

„Član 56.

(Zadatak Vijeća za GMO)

(1) Vijeće za GMO obavlja sljedeće poslove:

- a) daje mišljenja o upotrebi GMO-a u upravnim postupcima i drugim postupcima po zahtjevu nadležnih tijela u skladu s ovim zakonom;
- b) daje mišljenja i predloge u pripremi propisa o upotrebi GMO-a;
- c) daje mišljenja i predloge nadležnim orgainma državne uprave o pitanjima upotrebe GMO-a;
- d) prati stanje i razvoj u oblasti korištenja genetičke tehnologije i upotrebe GMO-a;
- e) prati naučno-stručna dostignuća i daje mišljenja u vezi s upotrebom genetičke tehnologije i upotrebom GMO-a;
- f) daje mišljenja u vezi sa socijalnim, etičkim, tehničkim i tehnološkim, naučnim i drugim uslovima upotrebe GMO-a;
- g) savjetuje nadležna tijela o pitanjima vezanim za upotrebu GMO-a i genetičke tehnologije;
- h) izvještava javnost putem medija i stručnih skupova o stanju i razvoju u oblasti upotrebe genetičke tehnologije i upotrebe GMO-a, te o svojim stavovima i mišljenjima;
- i) obavlja i druge stručne poslove propisane ovim zakonom i propisima donesenim na osnovu njega.

(2) Vijeće za GMO podnosi godišnji izvještaj o radu. Izvještaj podnosi Agenciji, koja o njemu informira Vijeće ministara BiH i objavljuje ga na način dostupan javnosti.”

Amandman XXIII.

Član 57. briše se.

Brisanjem člana 57. članovi 58. - 73. postaju članovi 57. - 72.

Amandman XXIV.

U članu 62., koji je postao član 61., u stavu (1) iza riječi „ nadležni“ dodaje se riječ „inspekcijski“.

Amandman XXV.

U tekstu Prijedloga zakona unose se normativno-tehničke ispravke u sljedećim odredbama:

U članu 4. u tački a) brojevi člana: „11. i 36.“ zamjenjuju se brojevima: „10. i 35.“.

U članu 64., koji je postao član 63., u tački b) broj člana „29.“ zamjenjuje se brojem „27.“.

U članu 65., koji je postao član 64., u tački a) broj člana „17.“ zamjenjuje se brojem „16.“; u tački b) broj člana „ 19.“ zamjenjuje se brojem: „18.“ ; u tački c) broj člana „21.“ zamjenjuje se brojem: „20.“; u tački d) brojevi člana: „23. i 24.“ zamjenjuju se brojevima: „22. i 23.“; u tački e) broj člana „ 25.“ zamjenjuje se brojem „24.“; u tački f) broj člana „ 26.“ zamjenjuje se brojem „25.“; u tački g) broj člana „26.“ zamjenjuje se brojem „25.“; u tački h) broj člana „27.“ zamjenjuje se brojem „26.“; u tački i) broj člana „ 29.“ zamjenjuje se brojem „28.“; u tački j) brojevi Člana: „ 30. i 31.“ zamjenjuju se brojevima: „29. i 30.“; u tački k) broj člana „32.“ zamjenjuje se brojem „31.“; u tački l) broj člana „ 32.“ zamjenjuje se brojem „31.“; u tački m) broj člana „33.“ zamjenjuje se brojem „32.“; u tački n) brojevi člana: „36. i 37.“ zamjenjuju se brojevima: „35. i 36.“; u tački o) broj člana „40.“ zamjenjuje se brojem „39.“; u tački p) broj člana „41“ zamjenjuje se brojem „40.“; u tački r) broj člana „42.“ zamjenjuje se brojem „ 41.“; u tački s) brojevi člana: „43. i 48.“ zamjenjuju se brojevima: „42. i 47.“; u tački t) broj člana „51.“ zamjenjuju se brojem „50.“; u tački u) brojevi člana: „52. i 53.“ zamjenjuju se brojevima: „51. i 52.“; u tački v) broj člana „55.“ zamjenjuje se brojem „54.“; u tački z) broj člana „15.“ zamjenjuje se brojem „14.“ i u tački aa) broj člana „16.“ zamjenjuje se brojem „15.“.

U članu 66., koji je postao Član 65., u st. (1) i (2) brojevi člana: „65. i 66.“ zamjenjuju se brojevima: „63 i 64.“.

U članu 67., koji je postao član 66. brojevi člana: „65. i 66.“ zamjenjuju se brojevima: „63. i 64.“.

Amandman XXVI.

U članu 70., koji je postao član 69., u stavu (2) broj člana «72.» zamjenjuje se brojem „71“.

Usvojeni amandmani identični su amandmanima usvojenim u Predstavničkom domu

Ad.7. Prijedlog zakona o dopuni Zakona o Javnom radio-televizijskom sistemu BiH (drugo čitanje), predlažać: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda je, sa 12 glasova „za“ i jednim glasom „protiv“, usvojio u predloženom tekstu Prijedlog zakona o dopuni Zakona o Javnom radio-televizijskom sistemu BiH u drugom čitanju. S obzirom da je Prijedlog zakona usvojen u različitom tekstu u odnosu na Predstavnički dom, Dom naroda imenovao je sljedeće delegate za članove Zajedničke komisije za usaglašavanje teksta Zakona:

- Alma Čolo
- Rudo Vidović
- Zoran Koprivica

Ad. 8. Prijedlog zakona o dopuni Zakona o carinskoj tarifi BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovao Adem Ibrahimpašić.

Dom naroda je, sa 12 glasova „za“ i jednim glasom „protiv“, usvojio u prvom čitanju Prijedlog zakona o dopuni Zakona o carinskoj tarifi BiH.

Ad. 9. Prijedlog zakona o Agenciji za razvoj informacionog društva BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali su: Zoran Koprivica, Rudo Vidović, Hazim Rančić i Alma Čolo.

S obzirom da u prvom krugu glasanja nije bilo entitetske većine, na sjednici Doma izvršeno je usaglašavanje u Kolegiju Doma kao komisiji (saglasnosti nije bilo), nakon čega je u drugom krugu glasanja više od dvije trećine delegata iz jednog entiteta glasalo „protiv“ pa je tako Prijedlog zakona o Agenciji za razvoj informacionog društva BiH odbijen u prvoj fazi razmatranja.

Ad. 10. Prijedlog zakona o zrakoplovstvu BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali Zoran Koprivica i Rudo Vidović.

Dom naroda jednoglasno je usvojio Prijedlog zakona o zrakoplovstvu BiH u prvom čitanju sa sljedećim zaključkom :

„S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o zrakoplovstvu BiH, produžava se amandmanska faza za ovaj Prijedlog zakona do 24 sata prije održavanja sjednice Komisije na kojoj će biti razmatran.“

Ad. 11. Prijedlog zakona o Agenciji za pružanje usluga u zračnoj plovidbi (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovala Alma Čolo.

Dom naroda jednoglasno je usvojio Prijedlog zakona o Agenciji za pružanje usluga u zračnoj plovidbi u prvom čitanju sa sljedećim zaključkom :

„S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o Agenciji za pružanje usluga u vazdušnoj plovidbi, produžava se amandmanska faza za ovaj prijedlog zakona do 24 sata prije održavanja sjednice Komisije na kojoj će biti razmatran.“

Ad. 12. Izjašnjavanje o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovao Zoran Koprivica.

Prijedlog zakona o maloljetnim počiniocima krivičnih djela i krivičnopravnoj zaštiti djece i maloljetnika nije dobio entitetsku većinu, pa slijedi usaglašavanje u Kolegiju kao komisiji.

Ad. 13. Prijedlog zakona o besplatnoj pravnoj pomoći (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali: Zoran Koprivica, Alma Čolo, predstavnik predlagača Srđan Arnaut, Hazim Rančić, Branko Zrno, Dušanka Majkić i Drago Ljubičić.

Prijedlog zakona o besplatnoj pravnoj pomoći nije dobio entitetsku većinu, pa slijedi usaglašavanje u Kolegiju kao komisiji.

Ad. 14. Prijedlog zakona o međunarodnoj pravnoj pomoći u krivičnim stvarima (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali: Zoran Koprivica, Alma Čolo, Hazim Rančić i predstavnik predlagača Nikola Sladoje.

Prijedlog zakona o međunarodnoj pravnoj pomoći u krivičnim stvarima nije dobio entitetsku većinu, pa slijedi usaglašavanje u Kolegiju kao komisiji.

Ad. 15. Prijedlog zakona o izmjenama i dopunama Zakona Bosne i Hercegovine o izvršenju krivičnih sankcija, pritvora i drugih mjera (prvo čitanje), predlagač Vijeće ministara BiH

Predsjedavajuća Doma naroda otvorila je rasprave o ovoj tački dnevnog reda. U raspravi je učestvovao Zoran Koprivica.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona Bosne i Hercegovine o izvršenju krivičnih sankcija, pritvora i drugih mjera.

Ad. 16. Prijedlog zakona o izmjenama i dopunama Zakona o ministarstvima i drugim organima uprave BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o ministarstvima i drugim organima uprave BiH.

Ad. 17. Prijedlog zakona o izmjenama i dopunama Zakona o državnoj službi u institucijama BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o državnoj službi u institucijama BiH

Ad. 18. Prijedlog zakona o izmjenama i dopunama Zakona o Agenciji za rad i zapošljavanje BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovao Hazim Rančić.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o Agenciji za rad i zapošljavanje BiH.

Ad. 19. Prijedlog zakona o izmjenama i dopunama Zakona o policijskim službenicima BiH (prvo čitanje), predlagač: Vijeće ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o policijskim službenicima BiH

Ad. 20. Odluka Predsjedništva BiH o postavljenju profesionalnih vojnih lica na formacijska mjesta u Oružanim snagama BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je potvrdio Odluku Predsjedništva BiH o postavljenju profesionalnih vojnih lica na formacijska mjesta u Oružanim snagama BiH.

Ad. 21. Odluka Predsjedništva BiH o učešću pripadnika Oružanih snaga BiH u misiji Snaga međunarodne sigurnosne pomoći (ISAF) u Islamskoj Republici Afganistan

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovao Slobodan Šaraba.

Dom naroda je, sa 11 glasova „za“ i jednim „suzdržanim“ glasom, potvrdio Odluku Predsjedništva BiH o učešću pripadnika Oružanih snaga BiH u misiji Snaga međunarodne sigurnosne pomoći (ISAF) u Islamskoj Republici Afganistan.

Ad. 22. Odluka Zajedničke komisije za administrativne poslove o izmjenama Pravilnika o međunarodnim aktivnostima Parlamentarne skupštine BiH – radi potvrđivanja

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je potvrdio Odluku Zajedničke komisije za administrativne poslove o izmjenama Pravilnika o međunarodnim aktivnostima Parlamentarne skupštine BiH.

Ad. 23. Izvještaj o radu Interresorne radne grupe za izradu Prijedloga zakona o imunitetu BiH

Predsjedavajuća Doma naroda otvorila je raspravu o ovoj tački dnevnog reda. U raspravi su učestvovali: Alma Čolo, Slobodan Šaraba, Branko Zrno, Mladen Ivanić i Ilija Filipović.

Dom naroda jednoglasno je primio k znanju Izvještaj o radu Interresorne radne grupe za izradu Prijedloga zakona o imunitetu BiH, te jednoglasno usvojio sljedeći zaključak :

„Zadužuje se Vijeće ministara BiH da u parlamentarnu proceduru dostavi Prijedlog zakona o izmjenama i dopunama Zakona o imunitetu BiH“.

Ad. 24. Izvještaj o aktivnostima na projektu „Autoput na Koridoru Vc“ i Plan narednih aktivnosti

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je usvojio Izvještaj o aktivnostima na projektu „Autoput na Koridoru Vc“ i Plan narednih aktivnosti

Ad. 25. Imenovanje predsjedavajućeg, zamjenika i članova Nezavisnog odbora i Odbora za žalbe građana, kao nezavisnih tijela policijske strukture BiH (Prijedlog Ad hoc zajedničke komisije za provođenje procedure imenovanja Nezavisnog odbora i Odbora za žalbe građana)

Predsjedavajuća Doma naroda otvorila je raspravu o ovoj tački dnevnog reda. U raspravi je učestvovao Mladen Ivanić.

Prijedlog za imenovanje predsjednika, zamjenika i članova Nezavisnog odbora i Odbora za žalbe građana, kao nezavisnih tijela policijske strukture BiH (Prijedlog Ad hoc zajedničke komisije za provođenje procedure imenovanja Nezavisnog odbora i Odbora za žalbe građana) nije dobio entitetsku većinu pa slijedi usaglašavanje u Kolegiju kao komisiji.

Ad. 26. Davanje saglasnosti za ratifikaciju izmjena Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji.

Ad. 27. Davanje saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc.

Ad.28. Davanje saglasnosti za ratifikaciju Sporazuma između Bosne i Hercegovine i Švicarske o olakšicama prilikom izdavanja viza

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju sporazuma između Bosne i Hercegovine i Švicarske o olakšicama prilikom izdavanja viza.

Ad. 29. Davanje saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju sporazuma između Bosne i Hercegovine i Švicarske o readmisiji lica koja borave bez dozvole.

Ad. 30. Davanje saglasnosti za ratifikaciju Okvirne konvencije Svjetske zdravstvene organizacije o kontroli duhana

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Okvirne konvencije Svjetske zdravstvene organizacije o kontroli duhana.

Ad. 31. Davanje saglasnosti za ratifikaciju Memorandumu o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanja, tehnološki razvoj i ogledne aktivnosti

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Memorandumu o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanja, tehnološki razvoj i ogledne aktivnosti.

Ad. 32. Davanje saglasnosti za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH.

Ad. 33. Davanje saglasnosti za ratifikaciju Sporazuma između Vijeća ministara BiH i Vlade Crne Gore o saradnji u oblasti kulture

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Sporazuma između Vijeća ministara BiH i Vlade Crne Gore o saradnji u oblasti kulture.

Ad. 34. Davanje saglasnosti za ratifikaciju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit

Predsjedavajuća Doma naroda otvorila je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je dao saglasnost za ratifikaciju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit.

Sjednica je završena u 15,40 sati.

Sastavni dio ovog zapisnika je neautorizirani transkript 25. sjednice Doma naroda.

SEKRETAR
DOMA NARODA
Marin Vukoja

PREDSJEDAVAJUĆA
DOMA NARODA
Dušanka Majkić